

Enaudèda “Galizia 1914”

A Luserna l'é stat l'inaudazion de la mostra che conta de l'esperienza di sudé trentins sul front orientèl endèna la Gran Vera

Mostres - Enstadi l'é stat avert a Luserna la mostra “Galizia 1914. I soldati tirolesi trentini nella Grande Guerra”, na esposizion che conta, dal pont de veduda storich, l'esperienza di passa 60.000 sudé trentins chiamé en vera da l'Imper Austroungarich del 1914 e mané sul front orientèl te la Galizia (anché teritorie anter Polonia e Ucraina).

Chesta mostra, che restarà averta enscin chest uton, l'é la scomenzadiva pissèda per chest an dal Zenter Documentazion de Luserna, che te sia senta l'endrezza mostres anuèles emporentes dedichèdes a temes de carater storich, naturalistich, etnografich, destinèdes a n publich belebon

slarià, integran la esposizions permanentes del Museo, e che de gra a chesta scomenzadiva l'à abù te chisc ùltime 5 egn passa 70.000 vjittadores, con na media de passa 12.000 a l'an.

A l'inaudazion la mostra é stata prejentèda dal diretor del Zenter de documenazion Lorenzo Baratter, e l president Luigi Nicolussi Castellan à recordà la bona colaborazion abuda te chisc egn ence con altra istituzions, anter chestes l Museo storich talian e de la Vera de Rorei.

Apede a ic l'era ence l'ombolt de Luserna, Luca Nicolussi Paolaz, l president de la Comunità di Altopians Cimbres Michael Rech, l conseier ladin e assessor regionèl

a la mendranzes Luigi Chiocchetti, e l'assessor provinzièl a la cultura Franco Panizza, che à recordà la scomenzadives pervedudes per i cent egn da canche l'é crepà fora la Gran Vera e l'à uzà fora l besegn per l Trentin de recuperèr sia identità plurilingue: “Luserna, per sia storia particulèra, la pel dassen esser n laboratorie de pèsc, convivenza, studie de sia identità e storia.”

La mostra, enaudèda ai 31 de mèrz, la restarà averta duc i dis fin ai 4 de november del 2012 con orarie 10-12.30 e 14-18. L'é possibil vjitàr ence la sales permanentes del Museo e dai 16 de jugn fin ai 9 de setember ence la Casa Museo e la Pinacoteca.



L'inaugurazione de la mostra “Galizia 1914”, (da cencia): Rech, Nicolussi Paolaz, Baratter e Chiocchetti.